



Anwar pada Majlis Peluncuran Bulan Kebangsaan dan Kibar Jalur Gemilang 2025 di Dataran Tanjung Emas, Muar, semalam. Turut hadir, Menteri Komunikasi, Datuk Fahmi Fadzil; Menteri Besar Johor, Datuk Onn Hafiz Ghazi dan Menteri Pendidikan, Fadhlina Sidek. (Foto BERNAMA)

# Agenda pembangunan tidak harus pinggir hak, kebajikan rakyat

**Muar:** Agenda pembangunan negara tidak harus membawa kepada perobohan hak dan kebajikan rakyat, sebaliknya mesti dilaksanakan dengan prinsip keadilan serta keseimbangan menyeluruh, kata Perdana Menteri Datuk Seri Anwar Ibrahim.

Beliau berkata pembangunan ekonomi yang mapan tidak wajar dilakukan dengan meminggirkan golongan berpendapatan rendah, tetapi pelaksanaan itu haruslah memberikan manfaat secara saksama kepada semua lapisan masyarakat.

“Jangan kita membangun sambil meroboh. Kita bina gedung, industri, teknologi, zon

ekonomi ... tetapi, rakyat ditekankan, tidak dipedulikan. Ini bukan pembangunan yang sebenar,” katanya berucap melancarkan sambutan Bulan Kebangsaan dan Kibar Jalur Gemilang 2025 di Dataran Tanjung Emas, di sini semalam.

Mengulas lanjut, Anwar berkata prinsip keseimbangan atau ‘ummatan wasatan’ yang ditekankan dalam al-Quran, merangkumi keadilan dari sudut iman dan ilmu, rohani dan jasmani serta duniawi dan ukhrawi.

Perdana Menteri turut menekankan kepentingan dasar fiskal yang adil, termasuk pelaksanaan cukai progresif yang menyasar-

kan golongan berpendapatan tinggi dan syarikat korporat yang meraih untung besar, bukannya membebankan golongan miskin.

“Kalau sekolah nak dibaiki, duit mesti datang dari mana? Kita kenakan cukai kepada orang kaya dan syarikat yang untung berjuta-juta,” kata beliau dilaporkan BERNAMA.

## Persoal pembangkang

Dalam pada itu, beliau juga mempersoalkan pendirian pembangkang yang membantah warga asing diberikan harga RON95 mengikut harga pasaran, manakala rakyat sendiri RM1.99 seliter.

“Mereka cakap warga asing pun bagi sumbangan. Tapi inilah yang saya tak faham sedangkan warga asing tak bayar cukai pun,” katanya.

Pada majlis itu, Anwar menyempurnakan pelepasan Kembara Merdeka Jalur Gemilang 2025 (KMJG 2025) yang membawa kelainan dengan gabungan kontinjen air dan darat.

Sambutan Hari Kebangsaan dan Hari Malaysia 2025 (HKHM 2025) pada kali ini menggunakan tema ‘Malaysia MADANI Rakyat Disantuni’ iaitu selari dengan konsep nilai kemanusiaan, keadilan dan kesejahteraan sosial.

BERITA HARIAN

28 JUL 2025

m/s: 3